

Bato mingi ya ntina oyo moto asengeli koyeba mbala moko soki abotami lisusu; soki te, Satana akosalela libaku wana mpo na konyokola ye mpe kobulunganisa ye mpo abandona lobiko na ye. Moko ya makambo yango ezali kosala ete moto ayoka lokola nyongo ya masumu ezali kaka na motema na ye.

Sikawa, soki moto abotami lisusu — *(kobota lisusu elingi koloba moto oyo abongoli motema na ye na solo, azwi mokano ya kotika masumu na ye, abatisami na libatizi ya solo ya mai mingi na Kombo ya YESU KRISTO, mpe azwi Molimo Mosantu)* — moto ya ndenge wana akomi ekelamu ya sika. Nzambe asilisi kolongola nyongo nyonso ya masumu oyo ezalaki likolo na ye, mpe akomi mwana ya solo ya Nzambe.

Kasi mokakatano ebandaka mbala moko nsima ya kobotama lisusu: bitumba ya makanisi ebandi na kati. Tango Satana ayebi ete okómi moyengebene liboso ya Nzambe mpe ngambo ya masumu esili, akobanda koluka bisika ya bolembu ya bomoi na yo ya kala mpo asalela yango lokola likonga ya kobundisa yo, mpo omona lokola ozangi motuya liboso ya Nzambe.

Likambo ya ntina oyo moto nyonso asengeli koyeba ezali ete kobotama lisusu ekomisaka moto robot te. Nzambe alongolaka te

makanisi nyonso ya kala mbala moko lokola machine oyo ba-formataka. Moklisto akobosana nyonso ya kala mbala moko te.

Tango moto abotami lisusu, Molimo Mosantu alongolaka liboso posa ya kosala lisumu na kati na ye, mpe apesaka ye komona mabe ya lisumu. Yango wana:

- moto oyo azalaki komela masanga atikaka,
- moto oyo azalaki kobeta makaya atikaka,
- mosambeli ya kindumba atikaka,
- moyibi abandaka kobanga Nzambe,
- motuki maloba mabe abandaka kotika yango.

Kasi mokakatano ezali ete atako atiki makambo wana, ayokaka lokola ezali naino na makambo oyo esili te na kati na ye.

Basusu balobaka:

- “Natiki kindumba kasi nalotaka naino bandoto ya bosoto.”
- “Natiki ekobo kasi makanisi mabe ezali kotungisa ngai.”
- “Natiki kosolola bato mabe kasi ntango mosusu namimoni nasali yango mpe nayokaka pasi.”

Mosusu alobaka: “Natiki miziki ya mokili, kasi banzembo yango

ezongelaka ngai na motó.”

Mosusu alobaka: “Nabongolaki motema mpo na likambo ya kala lokola koboma zemi, kasi naino nayokaka lokola Nzambe alimbisaki ngai te.”

Mosusu ayokaka makanisi koloba ete asambwisaki Molimo Mosantu, yango wana akolimbisama te.

Mosusu lisusu, nsima ya kotika kindoki mpe kopesa bomoi na ye epai ya Nkolo, amonaka lokola milimo mabe ezali koya kotungisa ye na butu.

Bato nyonso wana bazali na posa ya kozala basantu, kasi bazali kobunda na kati ya makanisi na bango. Libanda bazali koluka kotika lisumu, kasi na kati ezali etumba makasi ya makanisi.

Mosala ya Satana ezali kaka kokanga bango mpo na bozangi bokoli na bango ya molimo. Bayebi te ete banda mokolo oyo babongolaki motema mpe balandaki nzela ya lobiko, Nzambe asilaki kolimbisa bango na ngolu na Ye, kaka ofele — na misala te. Nzambe alimbisaki bango mpo na ngolu, mpe bakómaki basantu na Ye.

Ezali lokola motuka oyo ezalaki kokende mbangu mingi mpe epesami frein mbala moko: ekotelema kaka mbala moko te, ekokoba kokende mwa moke. Ndenge moko mpe na moto oyo abotami lisusu. Abimi sika na masumu, na mokili, na bizaleli ya kala.

Molimo Mosantu apesi frein na bomoi ya lisumu, posa ya lisumu etelema, kasi nguya ya kala oyo ezalaki kosundola ye ekosila malembe malembe.

Yango wana Biblia elobi:

Baloma 7:14-20 (Mokanda na Bomoi)

14 “Toyebi ete Mobeko eutaka na Molimo; kasi ngai nazali moto ya nzoto, natekamaki na se ya lisumu.

15 Pamba te nayebi te oyo nazali kosala; oyo nalingaka kosala, nasalaka yango te; kasi oyo nayinaka, yango nde nasalaka.

16 Soki nasalaka oyo nalingaka te, nandimi ete Mobeko ezali malamu.

17 Boye ezali lisusu ngai te nazali kosala yango, kasi lisumu oyo efandi kati na ngai.

18 Nayebe ete eloko malamumu efandaka te kati na ngai, elingi koloba kati na nzoto na ngai; posa ya kosala malamumu ezali, kasi makoki ya kosala yango nazali na yango te.

19 Malamumu oyo nalingaka nasalaka te, kasi mabe oyo nalingaka te, yango nde nasalaka.

20 Boye soki nasalaka oyo nalingaka te, ezali lisusu ngai te, kasi lisumu oyo efandi kati na ngai.”

Omóni? Soki makambo wana ezali koya epai na yo, yeba ete ezali na ntalo ya kolongola yango. Mosala yango ezali ya yo moko: kokabwana na nyonso oyo epesaka lisumu nguya.

Soki ozalaki na bomoi ya ekobo, pornographie, masturbation — bililingi mpe makanisi ya kala ekolimwa mbala moko te. Esengeli okima bisika mpe bato oyo batindaka yo na makambo wana.

Biblia elobi:

Baefeso 5:3-4 (Mokanda na Bomoi)

“Kindumba mpe mbindo nyonso to lokoso esengeli ata kotángama te kati na bino, ndenge ebongi na basantu. Maloba ya soni, ya bozoba to ya kosakana mabe ebongi te;

kasi botondi Nzambe.”

Mpe lisusu:

1 Bakorinti 15:33 (Mokanda na Bomoi)
“Bomikosa te: baninga mabe babebisaka bizaleli malamumu.”

Soki okobi kokima makambo wana, malembe malembe ekokufa na kati na yo. Makanisi mabe ekolonga yo lisusu te; okokoma na bokonzi likolo ya makanisi na yo, mpe bandoto ya bosoto ekosila.

Soki ozalaki koyoka miziki ya mokili, longola yango na telephone to ordinateur na yo, mpe tika ete banzembo ya kosanzola Nzambe ezwa esika na yango.

Soki ozalaki kokende epai ya banganga, kasi sikawa opesi bomoi na yo epai ya Kristo, tika kobanga. Zala kaka na mabondeli mpe na Liloba ya Nzambe. Ozali mwana ya Nzambe; ezali kaka kobangisa ya Satana. Malembe malembe ekolimwa.

Soki omimoni na kosolola bato mabe, kima bisika oyo esalaka yango — masolo ya mpamba, baninga oyo batongaka yo te, mpe makambo ya ndenge wana. Nsima ya mwa ntango, bizaleli yango ekokufa na kati na yo.

Makambo oyo okoki kolonga te na makasi na yo moko, kobunda na yango mbala moko te. Kima esika oyo ebandaka, mpe tikala mosika na yango. Nsima ya ntango okomona mbongwana.

Tango Satana amemeli yo makanisi ya kofunda yo, boya yango. Yeba ete Nzambe nde aponaki yo — yo oponaki Ye te. Toyengebenaka na misala te, kasi na ngolu.

Mokumba ya mosantu nyonso ezali komipetola mokolo na mokolo, ndenge Makomi elobi:

Emoniseli 22:11 (Mokanda na Bomoi)

“...oyo azali mosantu, akoba komibatela na bosantu.”

Kasi yeba: moto akoki kolonga makambo oyo nyonso te soki abotami lisusu te. Kobotama lisusu ezali na:

- kobongola motema,
- kobatisama na libatizi ya solo,
- kozwa Molimo Mosantu.

Soki osali yango naino te, zwá mokano lelo, mpo ntango ezali lisusu mingi te. Nkolo azali pene ya kozonga.

Tosengi yo kabola (share/print) nsango oyo mpo bato mosusu mpe bápona lobiko.

Nzambe apambola yo mingi.

Tika ete opambolama mingi. ☐

Share on:
WhatsApp